

擇石齋文集

擇石齋文集卷第十一

秀水錢載坤一

記

顯忠祠秋祭田記

明卹贈太常寺少卿禮科右給事中海石公顯忠祠在海鹽
縣城資聖寺之西公墓在縣之彭城祠之春秋祭歷久而同
墓之春祭直者長子之後中錢浜北老大房舊置田漸以難
勝載初心欲增置如現直之數而請家長議隨老大房後墓
祠分直兩年一更既因舒力實冀相察以久其傳然聞今所
改行者先從叔郡丞汝恭委曲以定者也載官京師未能越
局謹別立田四十四畝五分五釐嘉興縣荒字圩十四畝一分五釐宿
字圩十四畝四分張畧字圩十六畝
冊名曰錢祠秋祭田蓋私祭也蓋更別立田補行先墓秋祭

也霜露既零俾後世錫敬錫容錫三支蠲吉以拜獻于遺

直之堂心誠禮儉善守斯垂且兩年一交代以先墓秋祭之

田同其直蓋太尉廟祖墓近在縣城西北二里也太尉廟里

人稱太子廟相傳祀漢皇甫嵩公嘗爲之記謂予祖墓在廟

東今廟之東祖墓三穴古樹青蒼夫祭祠而兼祭墓相近而

墓先祠後然後徧祭先墓古者廟祀子不先父食若夫先墓

秋祭一房獨直者墓林不遠則日用其同兆域同原則先必

以世合兩田之入可無不足于供者哉其祠祭禮具祝文儀

之文酌以備用維年月日承祭孫某敬昭告于明郵贈太常寺少卿禮科右給事中

石公之位曰氣序流易神明式禮仰切靈帷不勝承慕謹以潔牲醴齊秋薦祠祀尚饗

然香燭薦大盤五格羊豕肉各四斤鴨雞大魚各一中盤十

格時蔬果醬鄉味野菜扁豆構栗橄欖蜜羅州菱藕蝦蛤蜊海蜆白皮子諸蔬菜之屬小盤五格鹽醬醋

蔥薑椒格三粉團角糝各三十初獻酒湯飯讀祝跪拜興亞

獻三獻如之紙錢十束楮鏹千同祝文焚徹以餽毋加品與

祭者歛則加菜腐予守祠者蔬果團糴加銀五錢其墓祭禮

西穴杯箸十正面四右二左二又右二中穴杯箸十四正面

三左五右六東穴杯箸二正面皆具祝文

維年月日承祭孫某敬告
于先祖先妣之靈曰歲序流

易霜露既零瞻省封塋不勝哀慕謹以清酌時羞跪薦祀事尚饗後俱以此酌之皆如祠祭禮慮夫力之煩而心

之急也權其所再儉者羊豕肉各二斤團糴各十前刻拜祭

墓地之神酒三齋肉二斤大魚一團糴各四紙錢一束楮鏹

一挂焚以肉魚團糴予守墓者夫祭祀之禮從俗而不變今

每歲之秋惟用羊肉十斤豕肉十二斤鴨四雞四魚五粉團

六十四角糴六十四紙錢四十束楮鏹四千者諸餘鮮物立

辦若是其至儉計夫久長而使之久長也承祭者其潔淨而

整齊哉租稅必簿記糧票黏簿以交代察過差毋怠廢津此

以糾夫凡所直祭義之田乾隆四十六年八月十五日
賜進士出身

誥授資政大夫禮部左侍郎祠下仍孫載謹記

太尉廟先墓記

墓以西爲上古法也先墓三穴以西爲上在海鹽縣太尉廟
之東我一世祖貴四何府君妣夏氏居縣之甘泉鄉明洪武
十四年以養馬不報論戍都勻世系諱生卒俱莫攷子二曰
禎隨戍于都勻曰裕畱撫于錢氏今海鹽之支已傳十有七
世而都勻之支居楊安堡祖墓連林相接入

本朝爲耕讀人家補縣學生舉鄉飲賓中式鄉試比歲枝遠
而實益蕃恩撫祖富一錢府君妣潘氏居縣治西世系諱生
卒俱莫攷無子嗣何氏子裕其墓初不知最後墓下孫汝霖

追攷之卽西穴也二世祖易錢姓如淵府君諱裕生洪武十四年妣曹氏生卒莫攷合葬縣之開濟鄉一都太尉廟東三百步是爲西穴三世祖考文學養素府君諱寔生永樂初卒成化初年月莫攷妣元配周氏繼室朱氏生卒俱莫攷合葬如淵府君墓之左是爲中穴四世祖考贈奉政大夫南京刑部郎中朴庵府君諱達生宣德六年三月十日卒宏治九年十月二十一日享年六十有六妣宜人楊氏生宣德八年五月十九日卒成化十九年九月十五日享年五十有一合葬養素府君墓之左是爲東穴蓋自_或推而上之三世也維諸支祖其葬同西穴同中穴者按墓碣家譜謹詳於後西穴恩撫祖妣二世祖妣居中而三世君靜安配潘氏耐右四世景寅繼生配周氏耐左五世菊莊配顧氏又耐右中穴三世

祖妣居中而四世景行逵配劉氏附右景訓迪配王氏凌氏
附左五世公美珩配張氏公節珮配鄭氏又附右六世繼中
崧配朱氏又附左是爲海鹽縣城西北二里錢氏之先墓何
與錢同出高陽氏之後曰陸終高陽黃帝之孫司空季子謂
黃帝二十五宗其得姓者爲十二姓姬酉祁已滕葳任荀偃
姁儂依然則十二姓皆同宗也而流派之出近古之同姓異
姓者蓋其姓愈遠之同姓異姓者蓋其氏逮夫氏族微而譜
系闕不獨何錢之世始于洪武之年矣顧卽十二姓歷半萬
年惟其中閏不絕所以得至於今則何之易錢猶是陸終也
墓下孫臨江太守琦先塋記曰名祖父詔後也載于是乎敬
以書先塋水西北五世公瑞諱瑄之嗣取壙承祭者
于是日三六禮畢後以牲醴菜拜祭附記于此

先墓秋祭田記

立田五十二畝

一分

嘉興縣永十四上十四庄盈通字圩六畝三分永十四上末一庄辰通字圩七畝九分又大畝及四畝及四畝永十三中七庄共二

字圩田連地十五畝兼一畝字圩八畝九分

爲先墓秋祭也冊各曰錢墓秋祭田我錢氏

先墓各立田行春祭而未行秋祭夫謂古不墓祭孟子有東郭墦閒之文矣至漢世四時皆舉唐詔土庶寒食上墓宋儒以謂後世習俗廢古祭禮始有墓祭嗟乎今且有廢墓祭者其歷之久也且必無後埽除絕而榛棘仍吾行于齊魯秦蜀之墟見夫古冢高起如山無主者墾鋤其半將盡然後知常祭之墓則其墓可常保而子孫之新壟不蕪穢則祖宗之舊壟或青蒼理勢然也載之謹此蓋自先大夫墓已上而其直與顯忠祠秋祭田同先墓皆在海鹽太尉廟者三穴其在化城封禮科給事中兩漕府君太孺人鄭氏合葬一穴其在彭城卹贈太常寺少卿禮科右給事中海石府君封孺人孫氏

合葬一穴其在南山明孝廉魯南府君孺人元配俞氏繼室
陸氏合葬一穴贈奉直大夫戶部湖廣清吏司員外郎前文
華殿中書舍人巨源府君宜人馮氏合葬一穴文學君政府
君孺人祝氏合葬一穴三穴皆在萬蒼山麓其在填城明山
東道監察御史孚于府君宜人黃氏合葬一穴
皇清贈通奉大夫明孝廉雍頌府君夫人譚氏合葬一穴
誥贈資政大夫國子監生又鶴府君夫人元配陸氏繼室吳
氏側室全氏合葬四兆府君弟國子監生亦駿府君孺人元
配許氏繼室葉氏合葬三兆一穴三穴皆在八都鹹園楊家
橋其豐山相近攜鰥兜遠祖何公之墓在焉先大夫墓在洲
航山麓萬蒼山麓之右蓋自先大夫推而上十三穴也歲取
田之入使常有子孫埽除蕪穢以敬奉秋祭何公之墓臨江

公請告歸始立碣而題之記曰鄉父老或指爲何長官墓冢
中瘞者或貴四翁之考妣或祖妣已上皆莫得而知或指冢
前水爲何家浜則今之攬鰓兜而其時同縣吳方伯昂鍾太
守梁鄭端簡曉皆有錢氏遠祖墓之詩太尉廟之西穴商隱
先生追放謂恩撫祖富一錢翁妣潘氏之葬實穴內嗚呼
貴四翁松楸萬里不有恩撫我其能反而祭何公之墓乎蓋
自恩撫翁媪已下何公之墓已下霜露既零由化城而彭城
而填城攬鰓兜而太尉廟暨顯忠祠而南山舟行百里之閒
路順一舟之便村山紅樹新米香聞其差無荒寂矣哉夫不
有祖宗何以有子孫載不能歲寒食以上冢少而授讀去其
鄉旣官于朝乾隆甲午奉

命典江西試乃請假省墓攬鰓兜十二歲先大夫攜拜墓下

至是六十七歲矣嗚呼先墓之拜世固有如是之難焉者乎
定爲禮前刻拜祭墓地之神香燭酒三爵豕肉魚各一團糗
各三紙錢一束楮鏹一挂焚以祭品予守墓者墓祭具祝文
薦大盤五格豕肉二斤雞魚各一左右新米飯中盤十格時
蔬果鄉味鹽醬醋蔥薑椒籠燭爐香初獻酒湯飯讀祝跪拜
興亞獻三獻如之紙錢十束楮鏹千同祝文焚十穴之禮同
至儉矣其惟紙錢楮鏹之焚則必多哉記曰明器神明之也
南朝有業鑿紙錢者此非備物而無所用如古之塗車芻靈
也載之後三支兩年一交代以顯忠祠秋祭之田同其直莊
星之後其助祭如禮乾隆辛丑八月載謹記

祀田記

立嘉興縣承十三中九庄月連七字圩田十五畝地八分永

十四上十二東成字圩田四畝一分地一畝八分又五畝六

分永十四下十七庄圩田十七畝三分背字圩田二畝五分

總四十七畝一分是爲祀田夫所謂祀者先人之家祭也

子世錫敬錫容錫三支兩年一更直今定忌日之祭自支祖

始謹誌忌日我支祖五世祖考贈戶部員外郎巨源府君三

月二十日妣宜人馮氏十二月十二日高祖考侍御孚于府

君九月一日妣宜人黃氏五月十七日曾祖考

皇清妣贈通奉大夫明孝廉雍頌府君五月四日妣贈夫人

節孝譚氏四月一日祖考

誥贈資政大夫國子監生又鶴府君六月廿六日妣贈夫人

元配陸氏正月初二日贈夫人繼室吳氏十二月二十八日

贈夫人側室全氏七月二十六日考

贈夫人側室全氏七月二十六日考

誥贈資政大夫國子監生約房府君正月十日妣贈夫人元

配朱氏五月五日贈夫人側室陸氏九月二十一日側室丁

氏九月初四日遇日合考妣以祭酒飯各薦四簋葷素各二

務整齊潔淨也香燭紙錢四束楮鏹千直田者先日闢于莊

屋之後俱來祭所拜祭其能各祭于其所居者則非所敢限

也如是則先人忌日之祭必舉而不祭者可有禮矣今定四

時之祭自支祖推而上至于一世清明夏至中元十月朔日

自一世祖考妣以下合祭如先像之禮設席五酒飯各薦大

盤四葷素各二香燭如忌日之禮而紙錢四束楮鏹千各席

各獻直田者亦先日聞而俱來祭所拜祭如是則先人四時

之祭必舉而不祭者可有禮矣載誠知夫貧而不能祀其先

者無可以安于心也況載幼而去家投讀父喪百日走客京

師既官于朝卽舉先人忌日時祭于京邸鄉園三千里其焉能如家之藹藹然近在而尤親切也我後之人其勉勉而繹思之故立此田冊名曰錢祀田永與墓下田同其直司其租稅簿記糧粟黏簿以交代其有過失者眾議之夫依賴先人得常霑祭肉味則平時亦可以自節其口腹矣今張夫人七月十二日增忌日一祭載三子後俱同拜祭其如禮乾隆四十六年辛丑八月十五日

賜進士出身

誥投資政大夫禮部左侍郎載謹記

祠田記

立嘉興縣芳字圩田廿一畝月六字圩田廿五畝三釐總四十六畝三釐是爲祠田錢氏未有宗祠乃每歲除夕至新正

二曰挂先像而祭之爲也我五房支祖巨源府君始自半遷郡城角里街祖又鶴翁始買宅城內巨源府君配馮宜人三子長侍御孚于府君次山徵谷庵爲滄嶼公後子商隱先生乏嗣矣次福徵厚庵乏嗣矣庶出治君政無子三支承祀祠堂主嵩厓府君也而老五房惟侍御一支侍御一子孝廉府君孝廉二子

誥贈資政大夫又鶴府君國子監生亦駿府君于是兩支之傳七房今七房之傳兩房又乏嗣寒門零落享祀愈疎載之立此田實惟先像之祭是亟夜堂鐙燭髣髴想音容炊飯一盤仰而跪拜尙知有祖宗考妣之可依可慕乎定爲禮至儉矣蓋自載已上一世祖考貴四何府君妣夏氏恩撫祖考富一錢府君妣潘氏二世祖考易錢姓處士如淵府君妣曹氏續

供三世祖考文學養素府君妣元配周氏繼室朱氏始有四世像

祖考贈奉政大夫刑部郎中朴庵府君妣宜人楊氏五世祖

考封禮科給事中兩涯府君妣太孺人鄭氏合祭設一席於

堂酒湯飯各獻大盤五格薦羊肉四斤豕肉四斤鹿肉三斤

無鹿肉或佛或鷄鴨後皆同雞魚各二中盤十格葷素鄉味蔬果從其宜小盤

五格鹽醬醋蔥薑椒粉團饊然燭焚香紙錢五束楮鏹一千

是爲中席之禮然後六世祖考卹贈太常少卿海石府君妣

封孺人孫氏七世祖考明孝廉魯南府君妣元配俞氏繼室

陸氏合祭設一席于中席之左酒湯飯各獻大盤五格薦羊

肉二斤豕肉二斤鹿肉二斤雞魚各一中盤小盤其薦如前

然後八世祖考贈戶部員外郎巨源府君妣宜人馮氏九世

祖考御史孚于府君妣宜人黃氏宜人卒于松溪孚于府君攜柩歸里失其像合祭設

一席於中席之右祭品如左席然後十世祖考

皇清貽贈通奉大夫明孝廉雍頌府君妣贈夫人節孝譚氏

通奉府君卒于明崇禎壬午巳而寓澤堂燬失像節孝夫人不嘗後先祖考在日畫主以供十一世祖考

誥贈資政大夫國子監生又鶴府君妣贈夫人元配陸氏繼

室吳氏側室全氏合祭設一席於左席之左然後十二世顯

考

誥贈資政大夫國子監生葯房府君妣贈夫人朱氏生妣贈

夫人陸氏庶母丁氏合祭設一席于右席之右祭品皆如左

席于是子孫其跪拜如禮錢鏹各焚立冊名曰錢祠田載後

世錫敵錫容錫三支其永與資政祭田之更直同夫供像于

一堂若祠然矣自載已上則一支承祭者其兩支俱同拜祭

即可無別設祭矣且自載已上推至一世則又鶴府君支下

亦駿府君支下俱同拜祭即可無別設祭矣于是俱至而列

拜可先後至而各拜可于是有不荅拜者有荅拜者若夫上

推一世而設祭則豈限其禮之所自盡哉每歲之除夕小年

夜

禾俗以新正二日爲小年夜

惟用羊肉二十四斤豕肉二十四斤鹿肉二十

二斤雞十二隻魚十二尾葷素鄉味蔬果團餅紙錢五十束

楮鏹萬雖歲之歉慮無有不足于供者且禾俗有茶食果品

團餅歲朝及二日之禮其各供中盤十楮曲禮曰禮從宜使

從俗他日

載與張夫人侍考妣席旁設箸兩副所幸子孫

衍他日推行而又各設若公堂者焉則豈非眾之所至願乎

且承祭之房以所徹邀諸房子孫男外婦內爲新年之會其

歲歲如是也禮行氣和而情可浹哉租稅必簿記糧粟黏簿

交代過失者眾議之乾隆四十六年辛丑八月十五日

載謹

記

先大夫墓祭田記

孝男載謹立海鹽縣唐字號田八畝九分嘉興縣新十二上十四天字圩田二十六畝四分又永十四上十四庄盈連字圩田九畝總四十四畝三分是爲

誥贈資政大夫考葯房府君

誥贈夫人妣朱氏

誥贈夫人生妣陸氏暨庶母丁氏永安湖州航山麓一穴四兆墓祭田大夫三子莊星之後同拜祭三子世錫敬錫容

錫三支兩年一更直敬錫於其母之喪降服夫降服子則爲

其子者爲其孫也且孫之後愈遠而常同則猶知其本生祖之墓也又安知其不有益于本生祖之墓哉司其租稅簿記

糧票黏簿以交代其有過失者眾議之前刻祀墓地之神酒

三爵豕肉雞魚各一粉團角糉各十香燭紙錢一束楮鏹一

挂焚以祀品子守墓人墓祭之禮具祝文朱子文集有墓祭文今鈔以酌用歲序流易雨露既

滿瞻省封塋不勝哀慕謹用清酌時薦大盤五格羊豕肉各十斤鴨雞

大鮮魚各二中盤十格時蔬果鄉味鶴雀燕與莖荷甘蔗地栗青菜雞子海蜇白皮干餅菜粉及腐乾之

屬小盤五格鹽醬醋葱薑椒格三團糉各百籠燭焚香初獻

酒湯飯讀祝文跪拜興亞獻三獻如之紙錢八束楮鏹四千

同祝文焚右祭其必潔也不敢豐者計長久也至儉矣所當

遵守矣飲餞卽祭品以辦毋加品席六人嚮上三揖齒坐酒

率三罈所幸孫枝蕃衍則量加韭腐其有於定品外思所嗜

以潔薦者誰曰不宜且有攜肴核來於入席次以酌其宗從

者又誰曰不宜飯已均分團糉嚮上三揖具錢千均給于船

人禮至儉矣所當遵守哉立冊名曰錢資政祭田其永與祠
田之更直同乾隆四十六年辛丑八月十五日
賜進士出身

誥授資政大夫禮部左侍郎孝男

載謹記

幼曰上冢行永安湖北岸守冢人指山麓曰周王山也
山中入于一支隴曰某山者隨所習而名之也意嘗有
周王其姓者屋於是今大夫墓在焉泐水東戶部公墓
又泐水東孝廉魯南公墓載以意改題曰洲航山墓右
石牆之外後買山四畝葬亡弟莊星又謹記

張夫人墓田記

祭田爲先墓之祭也而亦爲子孫之承祭者可稍節其餘以
補日用之闕載所欲豫立載墓下祭田張夫人在日嘗知之

今靈匱將自京歸葬先爲立墓田他年其同此享矣嗚呼夫
人未嘗自厚一飲食未嘗輕敝一衣也辛酉載授讀德清我
母朱夫人持貧家益力清明歸祀先喟然曰死而祭頭不如
其生而祭喉也載聞之心痛蓋禾諺有是語也四月盡我母
病載恩遽自德清歸母病亟以五月五日終嗚呼痛哉先大
夫既授家政載東脩所入薄夫人以之養我父嘗有肉不孝
不能養我母以夫人之養我父也未嘗一爲之言夫人亦
未嘗爲載言也嗚呼載不能養父母其敢有以及于妻夫是
以夫人夫婦四十九年家園邸舍百事蕭然所謂一世矣今
乃爲之立墓田且以自祭亦實爲所生之三子嗚呼夫人其
尙心安之也其田嘉興縣永十四上十二東成字圩三十一畝一分屋一閒基地五釐
永十四中十一餘字圩十三畝六分餘字圩十四中十一桑地五分
總四十五畝二分五釐立冊名曰錢墓田世錫敏錫容錫三

支永與錢祀田同其直其春祭如洲航山先大夫墓下之禮
秋祭如先墓之禮以行乾隆四十六年辛丑八月十五日載
記時年七十有四

錢墓地記

青囊下三卷一曰海角天涯經下土得之於何老人哉穀城
山下之黃石太史公曰亦可怪矣顧地理有也文公朱子山
陵議狀切實言之且公之敬慎以安其親之體魄也蓋可思
此吳草廬先生詩亦云葬術傳自晚唐也比年皆信蔣平階
地理辨正之書其來謂得之令謙平階字大鴻初名雯階字
馭閔明季嘉善縣學生也嘗見幾社會課文一小卷有其文
令謙字起敬嘉興人也洪武時太常司協律郎嘗見張宣至
正時聽令起敬琴詩墨蹟而世傳其仙去云今蔣書之祖青

囊皆本於河圖洛書八卦然歐陽公謂河圖洛書怪妄之尤甚者則夫青囊者其柰之何哉夫地理有也天也蓋蒼蒼者鑒其有德鑒其德之大小而與之地其人德也有財以求而得無財以求而固得矣其人不德也無財以求而不得有財以求而固不得矣蓋惟其所以得者人而後其所以與者天經典所言自天之下何一之不若是哉載之三子將葬其母用蔣書者說買地十一畝一分於嘉興縣永豐鄉九曲裏癸

卯冬載蒙

恩歸里遂以葬張夫人而卽自營生壙桑田稻蘆村港相依其在書曰降之降之蓋天道之所以降之者其在於斯矣張夫人生桐鄉縣東嘉會都安橋載生郡治羅城浜何知有所謂九曲裏哉而其骨乃俱歸于此歲云暮矣徒以申言其得

不得之數蓋嘗見夫曩古深山高原兆域千里百里形勢其所藏何如人哉且嘉禾所見古名墓氣象其何如人之藏哉卽我祖宗墳墓山水其何如也然後知分寸之攀躋有不容其私心竊冀者夫葬術非雜卽妄蔣書猶一綫遂於理顧鑿其說者人人殊然地無也非無也不得則弗之見也不得則見而猶弗之見也事雖更僕何莫非其人之天哉卽不用蔣書也亦然今其地立冊名曰錢墓地而記之乾隆丁未八月十九日載年已八十

侍御公義田記

明崇禎之初元高祖孚于公以貢生伏闕上疏劾魏璫壬午選授松溪知縣旋擢山東道監察御史

本朝順治三年丙戌高祖母黃沒于松溪丁亥公還自閩卒

于里此載為公元孫稱祖曰侍御公也公一子崇禎丙子孝廉雍頌府君孝廉子二先祖

誥贈資政大夫國子監生又鶴府君叔祖國子監生亦駿府君先祖六子以第三子後于弟而叔祖遺腹子一侍御公之後蓋七房也至于今二房乏嗣而五房以六房之孫為後實則五房矣詩書之澤衰微飢寒徒迫思之思之古者孝友睦婣任卹其何人哉職晚達惟賴

聖主深恩屢加拔擢至貳于卿班然安所得有財以補理先祖子孫之事歲鄉試典試請臣蒙

恩給之盤費銀兩職自編修至侍郎蒙

聖主深恩己卯廣西乙酉江南甲午江西己亥又江西庚子又江南典鄉試者五先後祇領盤費因得節餘而積少丙申

蒙

恩督學山東半任報滿養廉所節一千四百兩先是補置太尉廟祖墓祭田五畝太常公顯忠祠木器其已亥江西盤費三百兩又山東養廉一百兩將置高祖支下義田貯京邸三年寄家而未就癸卯蒙

恩予原品休致歸里始得定其田四十七畝三分八釐太常公公曾祖也舊有義田百畝時則請于族以田十九畝九分五釐增入凡若此者皆實受

君恩之賜伏念豐田盛殖富室之常何屑屑若是誠以臣家之所賴皆惟

皇澤之所濡或者其歷世以申延而不卽于堙廢乎夫是以敬告于後之人本無田且離江鄉者幾四十年不知田也

所增入太常支下者明年諸從以其田非腴也慮歲之饑何
可損舊之肥以益新之瘠而反其田戴思豐年多凶年少也
豐年多粒米亦可瘵一日一口之飢爰以所反田增入高祖
支下又買其旁車溝之地八分總六十八畝二分三釐是爲
侍御公義田而立冊名曰錢公義田擇賢輸直其分米如太
常義田之規矣嗟乎人多田少也何足以資其飢寒之生戴
若未死者補理先人墳墓之事竟尙其增置之哉現在田海
鹽縣呂坊嘉興縣大十六五庄調字圩號內記此者將以敬
俟後人之加置乾隆丁未八月初五日元孫戴謹書

資政義田記

府君厚荷 國恩榮膺

誥命初贈朝議大夫再贈三贈通奉大夫四贈資政大夫乾

隆癸卯戴以衰邁蒙

聖主深恩予原品休致嘗記朱子告休焚黃考妣謂流根之

報無復後期如斯言者爲人子也載惟賴

君恩拔擢又俾歸田報恩無所何能有以及於親前三年庚

子立大夫支下義田僅五十一畝九分嘉興縣移九上一庄小寒字圩號內移九上四庄某字圩號內

移九下三庄某字圩號內于是題曰資政義田立冊名曰錢資政義田而綴之

詞以定其規大夫三子載莊星也莊星蚤卒載三子世錫載

錫容錫藏錫爲先從兄虞田後然戴之降服子則大夫之降

服孫也其後亦食此田矣莊兩子禮錫六老星一子保錫六

老不習業悖教訓此不合于食義田者然大夫之孫近也姑

給之自後若六老者不給之矣前此輪直既歲收所入三股

均分歲凶則有米者讓無米者後此其仍擇賢兩歲一更先

納國租後分家米歲豐卽人多難足亦米少必均矣康熙戊戌大夫歸自京師油鐙夜坐始聞與先夫人願仿文正范公義田贍族自後常言之職聞之而竊亦有願六十年以來安所得金授徒不力嘗失館服官無狀嘗奪俸黜級革職職畱任顧安所得金苟其取非義之金以謂是義與也恐重違大夫未逮之志夫置田甚少則宜增職徒老不能矣三子衣食無餘殆不可矣夫惟追昔以知難又何敢恕今而有望雖然日月長矣天不靳人求福者遂他日大夫之後曾食此田者或增置一畝亦云義也則并入于冊其或多增則刻石以敬俟夫後乾隆丁未八月初五日男職八十歲謹記

九豐義田記

載三子無一畝之田分授之癸卯二月載以衰邁蒙

聖主深恩予原品休致十一月歸里亡室張夫人

冬世錫自京扶歸既卜地嘉興縣之永豐鄉九曲裏遂以十

二月葬張夫人即自營生墳先是徽錫容錫將葬其母築如

丙舍者三楹於今墓之西載取義束皙之詩九穀斯豐以適

合其地之永豐九曲名之為堂而曰九豐甲辰春

翠華南幸載赴常州恭迎

聖駕蒙

恩賜緞一端時皇子隨侍見十一阿哥于舟次謹請書

額以詒此九豐堂之所以成也三子卜地時置近鄉之田因

以其田立為三子之義田蓋分米不分田也于是即堂以各

田而曰九豐義田夫無一畝之分田而有此田之分米均于

三股旬月糧也果其為善讀書訓蒙得束脩以自補其闕菜

根脫粟夏葛冬棉

聖世之良士良民上可承先下可啟後長如此也仰天俯地
者樂哉樂哉或者增置而多之非義之財勿以增也或者各
置而遺之非義之財不可遺也然此亦何敢期必哉其田總
九十一畝五分五釐嘉興縣東成餘字往字三圩三十二畝二分永十四下十七
庄七畝屋三間永十三畝字圩三畝西原字圩六畝四分長
二十七庄六畝一分五釐月八字圩十畝五分又月八字九畝永十
四中十一庄餘字圩四畝四分秀水縣別一庄雲二圩十一畝九分立冊名曰錢九
豐義田三支輪直兩歲一更其均如前記行乾隆丁未八月
初五日載八十歲書

葦石齋文集卷第十一 終

葦石齋文集卷十一

六

擇石齋文集卷第十二

秀水錢載坤一

傳

馬得功傳

馬得功漢軍鑲黃旗人祖籍福建甲申明福王由崧自立于南京得功附之爲總兵官順治二年五月己丑

王師渡江由崧走太平蕪湖丙申南京城降田雄給負由崧走投軍門並縛其妃以獻得功實協力俱來丙午執由崧至南京以歸京師隨授得功爲京口總兵僞王朱誼泐與其經畧韋爾翰總兵楊三貫等聚掠得功率眾悉擒斬之四年進福建提督陳巳者倡逆連海賊陷松溪縣得功勦之斬僞總兵魯念什等三十餘人生擒已及海賊翟大梧蔣雲卿等百

餘人復松溪於是海賊康三賜高士通包自惺等以一千二百餘人降捷聞授一等子爵十八年追敘擒福王投誠功封三等侯康熙二年勅海賊會故福建總督李率泰以舟師進薄廈門金門諸島得功身先士卒深入賊巢與賊將周全斌等遇于烏沙港方力戰自辰至未而援師未至颶風暴起死

之事聞

賜祭葬謚襄武立碑于墓加封一等侯又加雲騎尉世襲罔替

張承烈傳

張承烈字繩武漢軍鑲白旗人世居瀋陽父卿累軍功官至福建建甯副將承烈例得七品廕康熙十三年逆藩吳三桂叛國家方用兵承烈年甫少學擊劍銳志從戎十四年始

隨副都統郎化麟于山東兗州敗土寇有功署參領尋隸將
軍穆占于湖廣十六年爲將軍吳國貴據長沙以賊數萬抗
王師時將軍令各旗諸將士之當掘壕與登陣出戰者曰分
旗爲更替其曰鑲白旗應掘壕而正藍旗應出戰承烈乃請
于將軍願出戰不願掘壕穆占壯之許焉承烈冒矢石直前
戰且久賊目駭其勇突中以烏鎗承烈負痛奪殺猶刃連下
賊益環鎗圍之決上流水驟至以淹沒于陣二十五年議卹
贈雲騎尉以其子孫襲乾隆十五年蒙
恩追念承烈爲國捐軀加給七品官世襲罔替

楊烈女傳

烈女嘉興縣梅里楊汝雯女少習詩書許同里陳生學澍未
昏生亡兄嘯嶠戒家人勿使女聞知居有頃生家來取聘物

女始驚駭哭嗚嗚願欲往陳守貞兄不之許且婉轉勸其再許而嫁女乃絕粒吞鉛粉醫三日不救以死年廿有四歲實康熙五十八年八月日也嗚呼方生家來取聘物義與楊女絕矣且卽未昏而再許以嫁於禮無乖違顧女之死必若是可不謂烈哉越三十有六年而同郡錢載書其事

上烈婦傳

烈婦楊氏浙江平湖縣人父兄儒學生以乾隆戊寅歸同縣儒學生卜錢熹卜故秀水恩賢鄉舊族堂上姑祖姑皆愛婦甚諸叔皆以嫂猶兄也已卯生秋試報罷抑鬱以病氏曲醫侍湯藥病亟禱先祠願以身代而生竟不起旣斂泣告於姑祖姑曰新婦不辰致夫夭折將來奉養諸叔任之義有相從地下耳姑與祖姑百方慰之寢食與俱父兄曰相走視開歲

正元農起隨姑行獻歲諸儀容止自若以故防護少閒而氏遂乘此時入房投繯畢命矣年二十有五距夫亡甫三月蓋未有所生也明年春同郡錢載聞其事書之以俟請旌之有徵

黃烈婦傳

同年雲南永北黃君素庵令甘肅入爲禮部主客主事其家府城夫人熊氏一子鈞例貢生鈞之繼娶蔣氏未舉男今年鈞二十有四歲而病沒于五月五日方鈞病亟氏已痛絕不欲生越七日內外服屬畢集也朝食婢在廚下婦乃入室闔戶自經死稍梳櫛衰麻被身竇乾隆乙酉五月十一日年二十有一歲蓋家人防之不及防也黃君得家問旣悲子之蚤世復哀婦之殉其子者烈也而屬載書其事永北之登進士

者在明有譚進士一本朝乾隆丁巳始有劉進士及壬申黃君而三今烈婦之死非止爲門戶光後來永北之稱黃氏者不惟以進士矣烈婦布衣蔣奇勳第四女生于甲子八月二十五日其結縭也癸未之七月二十九日二

夢堂詩老傳

元遺山于辛愿敬之有溪南詩老之稱前此則瀟南詩老也今東閣相公蚤歲自號曰夢堂其稱詩于江南知之者且五十年于是朝之後進翕然推之余之信而題曰夢堂詩老非其所自爲矣詩老之詩溫潤縝密超然意象之表姜堯章謂及其無見乎詩不求與古人合而不能不合不求與古人異而不能不異何其善言詩老之獨造而自得也其居京師北城手植海棠一株于檀欒草堂四十年矣春時必文讌花

下街南壘石架閣曰獨往園九日必高會以眺城西諸山
苑西寓直之所亦築小閣以眺西山平生抑然道義澹交如
水置身和介之間而一寄之於詩可以想見其中之所韞也
已詩老舉雍正壬子順天榜名英廉其先遼東姓馮氏初嘗
作吏江南晚而致位政府其事當在 國史非余所得書者
夫賢才出應 昌運鴻文彌綸而其下政事之餘詞華自見
則固我

聖主所有之人也不其偉與乾隆癸卯四月之望秀水錢載
傳

貶贈修職郎懷甯縣儒學教諭陸君家傳

寶山縣學生陸惟軾介陸朗夫中丞子綱具書以祖贈教諭
厚庵君家傳爲請而謂其先府君榜姓陳諱芳槐之志乾隆

十七年

一

四

恩科鄉試順天中式舉人二百三十名載第三十五其第七十六張耀朗夫也本姓陸第七十八則陳芳槐皆同年生也于是越三十有五年次君名汝寬字浚宣號厚庵按芳槐行述云府君至性過人素履淳篤而嘉定錢少詹事大昕誌芳槐墓謂厚庵第四人門無異財有浦江鄭氏之風蓋君沒于戊辰芳槐之舉壬申而沒于丙申又十有一年而爲之孫者猶永思若是嗚呼是可以觀君之德已高祖以上居上海東鄉曾祖變泉始徙嘉定高橋鎮今分入于寶山祖孟玉慷慨有志所居僅數椽立家祠于東而刻遺訓于石父太學生省齋端介訓子嚴從弟淇右蚤世撫其孤寡嘗多蓄法書名畫後以其季援例授職祖父皆得

誥贈奉直大夫君仲子也年始十四省齋銳欲以讀書起家
乃獨令廢舉業佐治生其家故貧得君備歷艱苦家以漸起
既兄弟爲學官弟子君乃辦裝勸更游學而身任門戶今陸
之子孫皆讀書然後歎省齋之知其子韓公所云固于是乎
在伯子剛直居常論事或詰難聲厲君從容片語兄且欣然
叔季或直陳所見竒聽受無忤色縣之人皆羨陸家孝友之
樂省齋身後伯子亦急治生寓吳門久一切家事悉令裁決
蓋無失兄意者通青囊術初葬其祖時卜壤吉省齋意莫定
君一言以定及葬其父審慎數四而後兆域成或病其泥君
曰地理不可知惟先人體魄之安豈以求福哉從母氏從媵
氏苦節爲之請而旌其門族有孤女必善嫁之親故有不
能喪不能葬者助之匱乏者求輒應壬子大水從父淇右從

兄樹庭匱俱衝漂乃沿江岸跣涉葭葦叢中數十里足指盡
血竟得兩匱以還丁卯復被水溺死者徧江海之濱乃請于
上海寶山兩縣令倡諸長者率錢盡收遺骸封爲義塚君自
少好讀書至是益聚書口決家事手一編不輟數爲子弟舉
古今成敗得失之故曰士當通達事理又曰士貴立志如小
學以明道希文自期待者名其堂曰四益蓋取後漢書藝文
志之義三十年間兄弟嘗以過勞勸君曰勞則善心生迨其
沒也神明炯然命焚香家祠遺言曰立身績學以勤爲本年
止四十六芳槐爲學官恭遇

覃恩得

馳贈修職郎懷甯縣儒學教諭元配蔡贈孀人卒年二十五
生子一卽芳槐繼室沈封太孀人生子二芳松芳柏近光孫

惟軾惟蘄惟磐曾孫揚曾敦曾述曾顯曾繼曾君嘗游于吳門愛其山水欲家焉既沒伯子以所營長洲生塲讓君惟軾等卜之棺前不許伯子乃爲卜于吳縣之堯峯其君之志也與往者爲陸燿曾祖撰吳江最角圩之碑江東之陸在元二百六十餘支則夫四百年以前寶山之陸吳江之陸皆魏晉後之江東也今歲丁未綴此文亦俾其補堯峯之墓之未有誌

歐連江家傳

君姓歐氏諱毅言字魏亭一號研齋父以賜研畀之卽自號也先世浙江東其遷德清自諱鄉者始七傳至君父諱麟祥歷官翰林院侍講學士五子君其次也生而嗜書襁褓嗚笑見書輒止及就外塾不煩講釋曉徹大義翰林胡彥穎吳

家騏皆其師學士所交如徐用錫陳鵬年輩多碩德鴻才君
幼侍得聞言論博覽載籍康熙己亥補縣學生庚子舉於鄉
主試臨川李紱浙之名榜也是歲學士以事謫戍甯古塔君
乃隨侍戍所聞之甯古塔去鸚哥關一千八百里其地有一
土阜初名之特後轉爲臺再轉爲塔固無臺無塔也掘地得
正隆錢或謂卽金之天會府寒暑不時與內地異君旣扶侍
久學士遣之會試雍正庚戌與仲兒振警同登進士是科一
甲皆浙人周霽沈昌宇梁詩正也而君以奉
旨派福建學習其時有進士學習知縣例遂知連江縣事連
江叢山環海故多虎亦多盜君嚴法捕之盡於是勸農桑興
教化編保甲務相感以誠相說以信賦惟正供訟無留牘又
設普濟堂育嬰堂義冢濬城河凡以贍民之生而恤民之死

也乾隆丁巳山水發大風雨縣治且溢八月拔蛟颶不止南門水高丈餘君肅衣冠拜禱風止水勢定於是上請捐銀穀賑貸並請捐田賦其水所衝陷者得永蠲除明年又饑募巨室捐米平糶四旬餘民以活嗚呼斯亦足以徵其治行哉縣有東湖隋開皇間義士林巽捐田瀦水所成隄之以溉田四萬餘頃千餘年矣侵占淤塞上滕崩豁泊水災後內隄蕩然外隄復浹開二十餘丈君亟上請乃加石築土修二百四十餘丈廣四丈隄成上植桃李雜樹下種荷蕖立祠以祀林巽民歌誦之又修學宮設義學修縣志之修于元而久不修者連江之人方樂君之靡事不舉而相與爲連江幸也

皇上初元

恩旨赦還麟祥君益感奮曰發言其何以一心報國乎將迎

養罄橐遺弟朝桂歸畢諸昏嫁事於是築室三間聚書其中
以迎養其父連江人曰吾侯孝子也庚申冬學士病劇不起
君居喪幾毀蓋自庚子以還奔馳鬱轡積患嘔逆至是扶喪
歸營葬未成而疾大作以沒四十有四歲連江人聞之相與
率私錢祠其侯於東湖之上嗚呼君之一生可不謂難乎其
於道也蓋庶幾哉今歲辛亥其家乞按其子更生所具行述
作傳以俟族譜之收采

王節婦傳

節婦王氏曹甯妻曹家于秀水縣太平坊王家于嘉興縣王
家坊相近在嘉興府城也王之先居王江涇遷于府城九傳
而爲婦之父臣桐鄉縣學生母巢氏明崇禎丙子舉人鳴盛
之孫生女二長卽婦生康熙二十四年十一月初十日二十

四歲而嫁嫁五年而甯以食貧學爲儒訓蒙養父母勞瘵沒遺孤懷祖甫三齡時婦二十八歲也伏屍長號出血不欲生翁曹袞秀水縣學生姑姚氏嘉興縣學生姚寅女哀門薄祐內外無親若婦竟死則曹氏且不保其先祀矣銜哀強起曰惟倚十指以存活夏無暑冬無寒米缺忍饑以不餒其夫之父母鄰里悲之教懷祖讀書翁姑相繼沒盡力殯斂先後三棺權厝他姓地母子衣食歲不周乃買地嘉興縣地字圩之永十三庄葬其翁姑葬其夫今鬱然松楸成墳矣蓋辛苦備嘗者五十三年至八十歲而以乾隆三十年正月二十二日卒後十餘年太平坊人相率謂曹家寡婦之節何以遲而弗請旌也里鄰親族具事實呈學牒縣申府司浙江巡撫疏請四十有八年十二月禮部具題奉

旨旌表官給建坊銀三十兩立主祀縣之節孝祠載入志書
又二年節婦孫貢生大全屬其友以姚氏王氏之族譜來乞
傳 贊曰今日知里中康熙間有少貧力學曹甯其人者徒
以其有節婦也 朝命旌婦名其夫以俱傳嗚呼世之節婦
有重于其夫者且庇及其子孫曹氏未有譜敘節婦以託始
其譜

趙孺人家傳

孺人趙氏吳江望族考諱廷相鄉飲賓母顧氏明成化辛丑
會元趙寬其七世祖也孺人年二十二而歸同縣范葵工部
侍郎諱燦之次子少司空長子理則蚤世無子孺人以始生
子墀爲之子今之請孺人傳列垂家譜以徵其本生母之德
於不忘者卽墀也墀生甫九歲孺人稱未亡人少司空以甲

辰進士改翰林院庶吉士外而歷官兩膺巡撫三十年開孺人之恪勤子婦職也布素操作雖無專於家事而鉅細豐約合其宜既痛其夫之抱才蚤世撫其諸孤教訓成立奉翁姑之疾病醫藥喪葬蓋有范氏之家風持己以嚴待人以恕宗族之不足者賙之鄉黨之待舉者助之而視夫之妾王氏體恤尤至其沒也呼子孫而告之曰我家以讀書登膺仕若無慚祖德卽無負 國恩矣是皆墀謹述母氏之行以願徵諸不忘云孺人生康熙五十年月日卒乾隆五十一年月日享年七十有六子三孺人生墀城王氏生塏孫十一子孫多爲國學生縣學生皆孺人之所教以承少司空之令緒者已

蘅石齋文集卷第十三

秀水錢載坤一

跋一

顧氏譜像合卷跋

珍山顧先生示載顧氏譜像合卷譜則自漢東海王搖十六傳而爲吳醴陵侯雍於史始有傳醴陵十二傳而爲陳祕書監野王祕書子五人盛南鴻南周南夏南允南允南仕隋封征西侯征西之元孫爲唐宏文著作郎況著作十一傳而爲宋大理寺卿明命號西嶺自東海至大理四十五世其兄弟之別出皆可攷宋元各人題贊尙有存者王梅溪顧氏家傳後序謂一卷龍圖閣學士臨所藏一卷大理卿明命所藏一卷資政殿學士其行所藏按大理臨從子其行於大理同祖

而此卷則錄自大理之所藏者也先生祖爲

本朝廣東學使勉齋先生學使考封興化守廷樞興化考鄉
飲賓道潔鄉飲考鴻臚丞起孝鴻臚考副使可久是爲洞陽
先生明毅肅兩朝以忠諫兩被廷杖者洞陽先生考封泉州
守榮章祖大宗伯信曾祖贈宮保壽高祖義士福五義士考
澤州僉判潤之僉判之高祖卽宋大理西嶺蓋大理又十五
傳而至先生云像則吳醴陵侯陳祕書監唐冢宰少連宋龍
圖閣學士暨大理卿而學使得此卷後增入洞陽先生意舊
所遺像不止是幸大理像猶存則由洞陽以溯大理以溯醴
陵且東海爲越王句踐七世孫寶大禹之苗裔則夫一綫相
承世德綿延有若江東顧氏者良亦罕已謹爲序次之以復
于先生以告其後賢之寶此卷者

題汪退谷瘞鶴銘考彙後

瘞鶴銘既辨其非逸少通翁書然考第二行華陽真逸譔上
皇山樵書則亦不得謂書者貞白也北固有米老題字云仲
宣法芝米芾元祐辛未孟夏觀山樵書斯爲得之太上黃庭
內景經徽宗題爲羲之書至松雪直曰爲楊羲亦屬之餐霞
服炁之人今年始獲見其蹟夫真蹟與石刻之僅存者惟貴
乎師法之又何必鑿求其姓氏爲邪康熙壬辰陳使君出銘
石於江岸甲午六月退谷爲作考此其初彙付萼兒藏者自
跋云集錄三日而畢酷暑揮汗雨淋不顧也今乃爲蔗畦所
購從此爲世間之寶矣余嘗得姜西溟湛園詩彙墨蹟凡四
帙因念文詞書畫之傳不必盡藏於其家之子孫而其傳爲
更遠西溟之擅書名前於退谷其事又適相類者他日亦當

裝冊與蔗畦共賞焉乾隆庚寅十月二十七日

跋羅旭莊自送出守德安序

羅旭莊前輩將出守德安自作序以自送其行此古人所未當有者同朝多著作家先生不之乞而乃煩先生之自言乎夫學道之微非其自知之則亦不能自言之願即自言之猶不能自行之也況于涖德安而隨時以宜民者先生其能一豫自言之乎然則古人之贈人以言固不若其人之自言或者其容有一當也乎庚寅十一月十七日跋

戴嵩牛跋

唐韓晉公五牛圖已入內府寶藏載嘗見吾郡項聖謨臨本而錄得趙文敏之跋此幅戴嵩所畫適購于虎坊橋肆晉公之鎮浙右嵩爲巡官一云爲幕客實師晉公畫牛諦觀此

蹟正不知於後來厲歸真裴文珣爲何如特愛別幅自題四
言疎峭古質且其書尤絕佳執筆運腕乃先得乎林韞陸希
聲南唐後主所屢經拈出衛夫人以來法如撥鐙者巡官若
此而晉公更何可遇諸想像閒邪米南宮云世俗見牛卽命
爲韓滉戴嵩甚可笑此之命爲戴不可笑也

題趙文敏摹李將軍明皇幸蜀圖

夏邑彭六一中允購得此幅以見贈款云大德十一年秋七
月廿又三日吳興趙孟頫摹李將軍明皇幸蜀圖於松雪齋
絹破色暗遽以付裝潢人而首行前十數字已爲所脫落矣
南宋趙與勳藏有李昭道摘瓜圖宣和畫譜李思訓無幸蜀
圖李昭道有摘瓜圖而石林避暑錄云明皇幸蜀圖李思訓
畫藏汝南郡王仲忽家嘗見其摹本方廣不盈二尺明皇作

騎馬相前後導從略備道旁瓜圃宮女有卽圃摘瓜者或諱
之爲摘瓜圖蓋明皇之幸蜀六月也故圖幸蜀者圖摘瓜後
人謂諱之矣而思訓之與昭道蓋莫之辨東坡先生亦云唐
李將軍思訓作明皇摘瓜圖嘉陵山川帝乘赤驃起三駿與
諸王及嬪御十數騎出飛仙嶺下初見平陸馬皆若驚而帝
馬見小橋作徘徊不進狀今松雪齋所摹正與之合妮古錄
云文敬家藏小李將軍摘瓜圖嘗倩胡廷暉全補然則文敬
此幅固摹其所藏之昭道摘瓜而仍從後人語題作明皇幸
蜀也筆法古秀設色蒼潤嘉陵山川何止渺然有數百里之
勢邪可不寶諸

鈔元蘇宏道書延祐甲寅科江西鄉試石鼓賦李
丙奎徐汝土王與玉陳祖義李路羅曾吳彝凱及

宏道八篇卷跋

自有進士科以來元仁宗始定制鄉試會試第一場以論語
大學中庸孟子發題用朱子集注章句訓義第二場亦試賦
右卷石鼓賦八首延祐甲寅第一科鄉試江西第二場試卷
之作也蘇君既爲其同舉七人者書之復以己作殿之試卷
之最初而僅傳於世所見蓋不能有二況墨蹟乎載借得此
卷壬辰九月廿八日恭屆孟冬朔

太廟時享齋宿簷事府遂依式鈔之幼不學書生疎謬戾筆
畫雜出乃不中與延祐甲寅江西諸君作謄錄生可媿哉時
年六十有五

塞上同徵小集卷跋

乾隆乙未五月

上幸避暑山莊載蒙

恩扈從時同扈從而有同徵誼者少宰曹地山副憲申笏山蓋同徵之官京師者邇年惟是三人矣今又同來塞上於是治具邀集已而復集又集情文周洽俱各有詩載爲兩公作畫卷又自作一卷相約各書其詩於卷中載詩不足存何況於畫其所存者存兩公之詩也且以同復四十年前同徵諸公之意也倡歎之餘能無感焉七月廿九日跋

又

載既就前卷閱曰請 皇子觀之爲題云乾隆元年丙辰

御試天下所舉博學宏詞於 保和殿取十五人二年又試取四人我

皇上述康熙己未

召試之事繼雍正癸丑

三詔之志將以見天下才也丙辰科劉文定公擢舉第一同徵者陳句山先生曾入直上書房錢坤一先生又於今歲九月入直上書房而以是卷見示余讀先生詩蓋深感

聖明之遇垂惜暮成亦以撫北上初心河干在目而因及友朋時會往復肫然猶夫古誼也足以傳矣然國家盛舉宜

備列同徵姓氏爲識不忘使後有所考乙未十一月廿三日皇十一子書於是載備錄同徵二百六十七人姓氏爵里又

跋之云皇子一言之重而是卷且可作公車小錄觀丙辰同徵有公

然則麗正門山莊正門名西山齋之集正有期也嘉平廿四日載詩

東小錄有昨者蒙恩召見惜賦之選中進士載奏及被薦御試之議又丙辰應詔北上先大夫送之河干先夫人送之中堂目載出門所以與字跋發明其事

王文成詩董蘿石像卷跋

靜志居詩話所敘董蘿石從陽明先生事卽此卷先生詩於稽山草堂之詩是也蘿石像當是其後人因詩而裝入以傳於家者久而失之今乃歸仰山陳孝廉攜以上公車遂來見示憶辛酉冬嘗拜蘿石之墓於羅漢灣閱四十年始見其像并獲觀陽明之詩與書紙絹幅尙皆完好孝廉以鄉里先賢敬爲什襲此卷亦可謂天地閒物也載先塋在永安湖北先太常與許雲村先生爲親家雲村亦從陽明游其居茶磨山去羅漢灣十數里孝廉家澈城載前年奉命西江製短筇一徧攬廬山之勝去年奉命秦蜀登華山青柯坪登吳嶽歷褒谷入劔門謁漢惠陵回道復奉命江南登鍾山攝山短筇蓋行二萬六千里矣他日攜之歸澈上與孝廉俱重尋許宅董墳低回於長松巨石之間希風曩哲詩云高山仰止

載雖老豈敢自後乾隆辛丑二月應孝廉屬書詩話於宣南坊卽卽以識

擇石齋文集卷第十三終

蘅石齋文集卷第十四

秀水

跋二

黃石齋先生畫松石卷跋

黃石齋先生畫松石卷跋

水壘松株十八葉法凡五簡筆皴斷厓一帶石之立者三而松則抱之倚之臥之又叢立於其顛自題報國寺後庭二高前庭二偃西山竇柏外無踰此應天南郊壇二林屋洞前一黃山之最著者曰卷龍曰破石曰自在松大段磊落當亦勃發其平生之所見耳嗚呼先生松也先生石也然則非松非石者烏可以題其所畫載當藏有倪文貞公山水樹石冊皆自題之其一云石介已極木淡無過世閒藤蘚將若之何蓋君子之守道而特立也藤蘚既無由攀附且擴然而憫其終

窮杜公詩十月清霜重飄零何處歸亦安忍有所薄於螢哉
覆觀先生之於松何其不著一藤於石何其不著一蘚也則
任觀者之各自得之而已卷今藏粵東潘毅堂中書所癸卯
八月廿日秀水錢戴潞河舟次

董文敏封奉政大夫翼所徐公墓表墨蹟跋

明封奉政大夫徐公學周嘉靖甲子同弟學曾舉於鄉嘗爲
蜀嘉州又爲粵雷州子必達萬曆壬辰進士累官少司馬卒
贈尚書有南州集孫世淳戊午舉人知隨州崇禎十四年死
流賊張獻忠之難子肇樑從死妾僕死者十八人贈太僕少
卿賜祠隨州嘉興孫嘉炎

本朝康熙己未舉博學宏詞官至內閣學士嘗思徐氏百二
十年以來忠孝節義文章有重於吾郡者不僅以科名今得

觀廬涇姚侍御所藏董文敏撰書大夫墓表墨蹟冊然後知
徐氏蓄積醞釀之所由來而攷之郡志有未悉似未見此表
者蓋表固未嘗刻石也因疏其略以論之其在嘉州釐口賦
則區法以立役法以均又清鹽茶之權土司嶺柏死族阿祭
與其妾子應昇爭立阿祭扇兵臺檄便宜從事公率兵九千
渡瀘斯阿祭立其宗之嶺起鳳而分地畀應昇亂以定然其
事幕府不以列上也採木詔下川民竭輸公身募餼餌諸苦
夷繩險冒瀉得中程材鑿山通阻會起蟄發洪神木自行而
出上計京師條上三難六易之議於何大司空以行楚黃耿
簡肅嘗題其議曰折算策行活川民以千萬計其在雷州固
爭濶洲防海之戰艦不可分而增置陸哨終公之任盜無竊
發嗚呼此隨州忠節之所自來矣而隨州之先後門地門才

光於里黨如是謂非大夫之有以啟其緒與大夫八十五歲
癸丑捐館越一年而葬冊末附文啟復尙書札云三兒皆以
試事游白下鄉試乙卯之秋也然則其撰書蓋去隨州死節
二十有六年嗚呼天道靡常作善降祥人世未形之事如文
敏當日者何得而知之然而君子其有以知之已嘉靖甲子
吾六世祖魯南先生舉於順天子紫芝翁舉應天戊午錢之
於徐同年而後有連也載家隨州祠西今徐氏稍衰矣然尙
書國老之廳隨州之祠屋依然屋後舞蛟石歸立灌莽中而
白苧村東南徐氏之宗祠在南張橋者放生河畔疎林清樾
其祀田猶存也侍御題冊謂暫收是蹟以待徐之後人此侍
御鄭重於鄉先賢之意夫人之賴文字以顯晦於穹壤間竊
以爲任其流傳而可矣亦何獨徐氏也哉

跋李繼泉山水

畫於癸巳明萬曆二十一年也嘉靖王子順天榜嘉興李芳
越十年而壬戌中式未廷試與本省同郡歐元佐項鈞沈元
華馮敏功王俸張大忠俞南金項篤壽卜相錢貢歐于國宗
宏暹鍾繼元張應治趙巖鄭履淳皆同年乙丑廷試令曲周
清勁明恕江陰多逋賦患盜移治之以最徵尋擢給諫中蜚
語謫饒郡丞投檄歸徜徉林壑者四十年今者以賢後人寶
愛此軸而請跋爰攷次郡之先哲使一溯其祖之同年竊計
諸家之後人其猶可一一訪也郡丞宇叔承號繼泉善山水
幅中巖凹雲氣潏潏遠峯高出大溪浸山根水莊深曲相連
樹石蕭疎淺淡設色意匠直逼元人居長水癸巳去壬戌
三十年非其村園蒔牡丹百種續歐陽作譜時所涉冬而託

興者邪觀於斯而興感已多然則翰墨之於人亦何可闕也
其子原中丙戌進士己丑廷試嘗令溧陽改大名學職以父
老歸亦著政績

書陸大夫誓墓圖稟後

乾隆十七年

慈壽恩科順天鄉試吳江陸君燿及載中式迄今丙午三十
有五年矣君以楚撫乙巳卒官歸葬先塋之次而不知其能
畫也此其誓墓圖稟癸卯作於任城書院者先是君以山東
按察乞

恩歸養太夫人壽終既耐於東顧之阡其時青龍岡黃河築
濟

天子亟籌運河隄工以耀勳任運河道能

特起赴工所未幾仍攝山東布政使司明年擢巡撫湖南今
其子綱奉圖稟請題乃得見故人手蹟吳江之陸世家蘆墟
其墓於縣之二十九都最角圩者始大夫高祖諱照然字君
亮以上蓋一原四冢今圖中水北古木蒼然而石坊豐碑屹
立曾祖 贈通議大夫諱堉元字廣生墓附焉水南松楸
鬱然一林祖 誥贈通奉大夫諱銓字公衡之墓而考 誥
贈通奉大夫諱瓚字虔實之墓附於右其東又松林下有兩
冢則虔實府君之兩弟大夫以府君友變而營於同原其西
架屋三楹是爲東顧丙舍最角圩一名東顧而大夫墓在內
舍右葬太夫人之年所自營之生壙惟不取青烏言陟降相
觀高曾祖考五世以上水南北兩原如一原焉祖先之魂魄
往來相依孫子之歲時拜瞻切近南原水周三面墓林之南

稻田畇畇田之外又橫河四通村落矣其誓於墓者大夫寒
士被

聖主知遇有年復起驅馳告誓先墓而行是心之誠所謂有
如礲曰者不必徵其誓詞何如國家所重賴臣忠子孝之人
豈有外於區區此心者哉綱乎竇此手蹟也豈不以所誓教
其子孫而實惟明白其墓處吾是以歷歷於南北東西大夫
知之此其蘆墟陸氏先墓之記也與

陸朗夫嶽麓圖跋

乾隆己卯

載奉

命典廣西試回道衡州登祝融峯絕頂明日下山卽就道行
未能至方廣亦未見嶽麓也今以直之奉其先公所寫嶽麓
圖求跋而回憶之然載之未見嶽麓特一日之游耳昔者朱

子三十八歲訪張敬夫先生於潭州范伯崇林擇之侍行遂
相與徧覽南嶽之勝倡酬賦詩至百七十首今讀朱子所記
既約毋作詩矣又復作詩而仍歸於戒懼警省慮其流而至
于喪志且盡錄贈處之篇謂暇日出觀亦足當盤盂几杖之
戒蓋先賢之訪友而游山其皆爲講道論德也如是伯崇嘗
言二先生論中庸之義三日夜而不能合夫是以南嶽之古
今游者凡幾而二先生乃渺然不可以攀躋載不能讀朱子
之書蓋有媿于朗夫者朗夫學道進進而未已其駐節長沙
面湘江而圖嶽麓意蓋在書院也朱子嘗作石鼓書院記矣
謂以風曉在位使知今日學校科舉之教之害不可以是爲
適然而莫之救而援張子敬夫之所以記夫嶽麓者蓋南嶽
之書院嶽麓石鼓是已朗夫之按察山東嘗闢蒿庵書院余

爲書其辨志之堂使朗夫而不遽歿於長沙也興朱子書院之教於嶽麓而不惟科舉以爲教其所裨益豈在一時也哉
丁未八月八十老人錢載跋

張氏角里山墓廬圖跋

海鹽張明經燕昌遷葬其瓜圃府君於縣西南角里山之原將構丙舍於墓側以終老焉而其友豫作廬墓圖以爲贈金粟諸短山松篁連屬茶院通園之水東西灣環田家梅塢桑塍與煙雲平遠相參差唐準高僧塔處宋秦溪二字石刻猶存此余山居夙願不可必遂者而張子乃依其先人竟得而有之乎夫廬墓始於弟子之於師也孔子歿惟子貢廬于墓上者又三年晉代後多有葬親畢廬於墓次者百年以前吾鄉巢端明先生廬墓至三十年今張子乃踵迹前賢永慕於

角里之山與然余以爲畫者宜題作角里墓廬圖也蓋曰墓廬則義屬於墓曰廬墓則義屬於廬矣屬于廬則圖而傳之者明經子之所有事也張子固已首曰余言也夫

九靈山房圖跋

浦江戴君劍溪來爲嘉興府儒學司訓詒我以九靈山房之集而屬題其九靈山房之圖蓋叔能先生司訓十四世從祖也戴氏世居九靈山下先生自號九靈山人山人嘗作九靈山圖出游所至張之壁名其居一時若周伯琦書之胡惟仁烏斯道記之唐之淳賦之丁鶴年輩詩之而今之圖則劍溪所爲追惟先烈而作也於是受讀山房之集率皆有得於道之言自非有得於道者不能爲此言也其待制柳公贊曰朱學之傳至於文安公得其師猶水有源此則先生之所學其

投知己書曰凡其艱難而僅得者不過用以資其詩與文而於古聖賢人之道則固未之有聞也嗚呼此則先生之所詩與文者矣再觀於圖之崖谷泉樹約畧先生九靈山詩所云屋廬冢墓其處者以想見夫往來柳文肅黃文獻吳文貞三先生之門而嘗與宋文憲先生合堂同席以學其所學也江山和粹之氣蓋適聚於其時也哉夫識小識大道之在人則夫金華之風朱子之緒百世而興起者其猶在浙水之東也與司訓九靈之戴氏又居近鄭氏之義門其怡然高望也圖且有以傳之矣

錄永和甄字題後

口王夫人墓誌銘

井序

口口郡人也稟質貞口口三從有義四德無虧口口忽避彌

留曰復纏口口正月廿八日歿於口口歲次庚戌二月廿七
口口西北十里武丘山口口口二人長子珣次子口口恐陵
谷口口

方甄踰尺之一角左上下斷缺脩六寸廣八寸面刻界道絲
紋縱八行半橫七格半正書斷缺識者六十四字墓誌銘甄
也出土於虎邱短簿祠處短簿祠吳郡志在虎邱雲巖寺寺
本東晉王珣及弟珉之宅珣居征西府時號短主簿因以稱
其祠晉書王洽子二珣珉今誌序子二人長子珣次子則必
珉也夫人吳郡人始興郡公太傅導之子婦吳郡內史徵拜
領軍洽之妻散騎常侍珣侍中兼中書令珉之母惜也其氏
今不存矣庚戌穆帝永和六年洽升平二年戊午卒年三十
六去庚戌八年則夫人之蚤世其二十以上抑未及與武邱

南史何求何點隱吳郡武邱山蓋以武改虎卽越絕書闔門外之虎邱恐陵谷今歲乾隆戊申而見此顛則其陵谷也且一千四百五十年其書古厚沈實妙參楷隸夫江左嗣興實惟仲父而一門文藝三世善書導學鍾繇衛瓘攜宣示帖於衣帶以過江洽與從兄羲之變章草爲今草羲之嘗云弟書遂不減吾則當其書夫人誌自非有鍾衛法者不以屬之矣越三年癸丑而世乃有羲之蘭亭序之傳則是書之出於今豈非希世之寶哉曷考墓誌之始炙轂子謂起宋元嘉中顏延之爲王球作墓誌今此晉永和墓誌銘也前乎宋元嘉之改元七十有六年且庚戌之葬夫人吳郡內史也太傅葬於咸和庚寅二十年矣二子依其母墓以居又安知內史之不台葬于斯乎王氏家風意常有其爲吳郡尸祝者不然何以

虎邱至今尚存珣珉之東山西山二廟秀水錢載題

神龍蘭亭跋

此本爲宋本無疑後有宋文憲公金華宋氏景濂邵文莊公國寶兩印余藏有文莊墨蹟取勘此印正是一石其非吾禾項氏所刻于明中葉者明矣

又

米氏書史云王文惠之孫居高郵收得褚遂良黃絹上臨蘭亭一本後欲售之流轉數姓而終不果得王虛舟跋其神龍本云嘗見褚摹黃絹真蹟與此正同則此刻當卽米氏所記黃絹本也戊子十一月三日再跋

又

武后周天授元年又十五年爲神龍元年中宗復辟不改元

則神龍周之神龍也於時太平公主借出褚臨摹刻而遂亡之此鈐印有褚印貞觀印則太宗賺得真蹟命歐褚諸臣臨之藏於內也自人閒流轉米芾嘗觀欲售而不果至紹興興得乃有米芾紹興印則此刻當在宋之南渡其搨法紙紋墨采適與蠹所見趙子固落水五字未損之定武宋本同春圃獲此於官翰林時二十餘年矣今以方伯解組里居出觀再得流連而審諦之夫優閒歲月皆沐

君恩卽曰者復起驅馳則此帖又將隨之行矣瞬息朽槁能不矜其眼福邪曩在京師數觀褚臨絹本賜高士廉快雪堂上石者不知其今落何所又五字未損本歸蔣氏失去聞今在江南銷夏記之肥本也其瘦本缺角處有柯九思印羣帶右流天五字已損趙士禎小楷其後今在載所至寶也何

嘗與神龍相上下哉戊申六月八十一歲戴又題

雲麾將軍李思訓碑跋

論者謂右軍行法李北海得其妙而擺脫之頓挫起伏書中之仙北海雲麾碑有二其一李秀碑已琢作圓礎六余嘗得其搨本四似趙文敏之於晉人頗不似此李思訓碑故知文敏大書之於北海不止出於一碑也思訓碑北海蹟之最妙者此搨當是宋本字之闕損者尙不多其在今日尤當寶惜之至矣思訓善書又善畫推李將軍山水昭道亦善著色山水卽小李將軍余藏有其父子金碧大幅各一軸

題王振鵬墨梅

孤雲處士以界畫金碧稱絕李太僕品之云格力超騰非院中人所能嘗見其人物亦藏其界畫而未知其能墨梅也墨

梅始于華光長老趙子固詩逃禪祖華光閒庵紹逃禪又云
從頭總是楊湯法孤雲生華光逃禪閒庵之後在煮石山農
之前余有山農墨梅在紵帳兩幅上持較之正覺其相敵耳
孤雲與山農固不能外楊湯法也古人之於書畫法往往無
所不通無所不妙安可以常格拘墟之

題陳小蓮山水

芝之可食而仙槩見於抱朴子蕭靜之得肉芝烹而食之齒
髮再生此圖烹芝者得非靜之其人邪小蓮之於老蓮猶沱
江之于白陽也王會州謂沱江頗足跨躡余于此幅亦云

題北宋院本設色窠石竹梅山茶雀鷓鴣

此北宋院本也二十餘年前見之京師常賣家今年己酉復
見之禾城往余題趙子固東坡笠屐圖硯云積書巖空又流

轉昨歲在粵今在京不脛而走物類且然哉觀世者可以觀化矣

文待詔葵陽草堂圖跋

嘉興沈明經柳坪子清旭小名葵陽十五歲而殤柳坪既塋而葬之其師蔣春雨明經銘之余爲書之而陸侍郎復跋之里所傳沈童子塋銘也蓋以葵陽能多讀書有夙慧非尋常童子比耳今春柳坪購得明文待詔爲李中翰所書葵陽草堂圖乃不勝感念以葵陽之與葵陽適相觸也屬余記明其事噫沈童子之精靈其依此卷乎則吾不得而知顧昔之葵陽在李中翰今之葵陽在沈童子矣衡山先生又豈知爲沈童子圖葵陽哉柳坪其亦可以適相慰矣

題董北苑夏山深遠圖

北苑畫管見其瀟湘橫卷董文敏所藏有北苑畫四最後最
佳則瀟湘也後爲畢大中丞秋帆購去又嘗見李營邱大幅
宛平同年張部曹晴溪以千金得之然後知無李論猶不足
信也余則藏有河陽大幅項子京孫退谷梁真定諸家所藏
皆冠世之蹟此幅北苑皴法不用輪廓其深厚全得山脈起
伏之勢樹蒼而靜苔潔而圓其爲真蹟無疑又曾見其夏山
欲雨圖蓋北苑常畫夏山而寫皆金陵山也惟瀟湘卷則楚
山此幅題者歐陽圭齋倪雲林張伯山許祭酒皆句佳而蹟
真豈不可重寶之哉乾隆五十八年夏仲日

沈極吉山水卷跋

此豈沈氏之西莊圖邪抑豈其有竹居之景物邪溪山灣環
竹樹茂蔭塢中茅屋數間秀起小樓一人拓窗高臥圖書插

架屋內一婦提攜稚子斃屋一嫗捉箸與稚子飯一女斃立
竹籬四周籬門一人扶杖仰觀一人背立相向一僮門內指
碣岸臨溪左右大石磊砢夾水遮映苔點蒼潤溪水四出前
跨板橋橋陰北巖瀑泉落溪灘疊瀉灘岸坐立兩人一人
濯足灘水中又前高石欲壓坡斜水闊一牛過山嘴一童坐
背吹笛一牛將轉坡一童立背拽鼻而屋後兩山夾徑一人
綠陰中騎而來如官人過訪者一僮捧紅氈隨于後布置清
深氣象靜穆成化四年仲冬陶然老人沈恆石田先生之父
所畫也先生之祖澄所居曰西莊兩子貞字貞吉號南齋恆
字恆吉號同齋皆以字行嘗構有竹居兄弟讀書其中工詩
善畫竝年八十餘同齋山水亦宗北苑其畫絕少蓋不易得
者成化四年同齋當六十餘石田四十二歲矣聞之石田山

水四十歲後始拓爲大幅於古人無所不師則是時陶然偶
作非所謂虛和瀟灑正其兄弟之家學足以傳者邪